

Naqqiut

Naqqiutip akissuteqaat 25. oktober 2018-imeersoq taarserpaa
(Immikkoortut pingajuat allannguuteqarpoq)

Naalakkersuisut nunatsinni eqqumiitsuliortut atorsinnaasaannik eqqumiitsuliortut suliffiannik pilersitsisinnaanermi pitsaaqutinik pitsaanngequtinillu imaqartumik suliniummut pilersaarummik suliaqaqqullugit. Suliniummullu pilersaarut kingusinnerpaamik UPA2020-mi Inatsisartunut agguanneqassasoq, pilersitsinermik ingerlatsinermilu aningaasaqarnermut allanullu tunngasunik misissueqqissaarnermik imaqassalluni. Tamatuma saniatigut Naalakkersuisut eqqumiitsulioriaatsit sorliit sullivimmumut taamaattumut periarfissaqarnermik iluaquteqassanerat pillugit kaammattuuteqarnissapput.

(Inatsisartunut ilaasortaq Aqqaluaq B Egede, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Siullermeerneqarnera

Inatsisartuni ilaasortap Aqqaluaq B Egedep, Inuit Ataqatigiit, nunatsinni eqqumiitsuliortut atorsinnaasaannik eqqumiitsuliortut suliffiannik pilersitsisinnaanermi pitsaaqutinik pitsaanngequtinillu imaqartumik suliniummut pilersaarummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuuteqarpoq. Suliniummullu pilersaarut kingusinnerpaamik UPA2020-mi Inatsisartunut agguanneqassasoq, pilersitsinermilu ingerlatsinermilu aningaasaqarnermut allanullu tunngasunik misissueqqissaarnermik imaqassalluni. Tamatuma saniatigut Naalakkersuisut eqqumiitsulioriaatsit sorliit sullivimmumut taamaattumut periarfissaqarnermik iluaquteqassanerat pillugit kaammattuuteqarpoq.

Eqqumiitsuliortut kulturikkullu ingerlatsisut ullumikkut periarfissagissaarput eqqumiitsuliornermut kulturimullu Naalakkersuisut aningaasaliissutaannit tapiiffigineqarnissamut. Tapiissuteqartarnerup inerisarneqarnera naleqqussarneqarneralu sulissutigineqarput, tassa eqqumiitsuliortut periarfissamik atorluanaanissaat anguniarlugu.

Eqqumiitsuliornermik ingerlatsineq pillugu Inatsisartut inatsisaat nr. 11 6. juni 2016-imeersoq §5 imm. 1 naapertorlugu kommunalbestyrelsep pisussaaffini maleruarumallugit, init sinaakkutissallu tigussaasut allat atugassannngortissavai, aamma init sinaakkutissallu tigussaasut allat naapertuuttut pissarsiarinissaat peqataaffigisinnaavaa. Naalakkersuisut isumaqarput, sullivik taamaattoq sumiiffimmi ataatsimi inissisimassappat tassani sumiiffimmi innuttaasut kisimik annertunerusumik iluaqusissagaat, tassami nunatta isorartussusaata angalaniarnerullu aningaasatigut ajornakusoortimmagu, eqqumiitsuliortut najugaqarfimminniingitsoq sullivik sumiiffimmi aalajangersimasumiittoq atussappassuk.

Taamaattumik sullivimmik pilersitsinissamik akisussaaffik kommunini inissisimaneruvoq sumiiffinni kommunalbestyrelsip pisariaqartitsineq nalilerpassuk.

Eqqumiitsuliornikkut Pinngorartitsisut Ingerlatsisullu (EPI) ingerlatsinermut aningaasaliiffigineqarsimapput, tassa assersuutigalugu atuakkiortut eqqumiitsuliortullu allat suliaminnik ingerlatsinissamut allaffimmik pisariaqartitsisut atugassaannik.

Peqatigiiffiit kattuffiillu allat, soorlu KIMIK, Kommuneqarfik Sermersuumit sannaveqartinneqartoq Tipsernermit lottornermillu aningaasaliissutinik qinnuteqareernermigut ingerlatsinermut aningaasaliiffigineqarsimasoq. Tamakkualu piviusunngortinneqarsimapput eqqumiitsuliortut namminneq suliniuteqarnerisigut.

Taamatut Naalakkersuisunit akissuteqarluta, inassutigissavarput siunnersuut itigartitsissutigineqassasoq.